

25 IULIE RUGĂCIUNEA ADORMIRII SF.ANA

Молитва

О, святая праведная Анно, рождавшая прежде век предопределенную родиться Матерь Божию, прамати Всемиловитоваго и Всещедраго Спасителя нашего, готовое заступление и предстательство с верою к тебе притекающих! Ты душею на Небеси у Престола Божия предстоиши, на земли же, данною тебе благодатию, различная совершаеши исцеления. Призри убо милостиво, праведная Анно, на предстоящая люди, молящиеся пред святою иконою твоею и просящая твоя помощи; простри ко Господу святая молитвы твоя о нас, недостойных, и испроси нам оставление согрешений наших; подаждь недужным исцеление, скорбящим утешение, бедствующим скорую помощь; даждь плод чрева призывающим тя, разрешая их бесплодие; призри на молитвы безчадных жен и благочадны их сотвори. Приими

моление нас, грешных, святая Анно, и
преложи печали наша в радость, яко да
твоими молитвами получивше благодать и
милость, прославим всех благих Источника
и Дароподателя Бога, в Троице Святей
славимаго, Отца и Сына и Святаго Духа,
ныне и присно и во веки веков. Аминь.